


Nkolo na biso YESU KLISTO apambolama libela na libela. AMEN.

Boyá tóyekola Liloba ya Nzambe lelo, wana tozali na mokapo ya 3 ya buku ya mosakoli Yona. Na mikapo oyo eleki tomonaki ndenge pasi mpe minyoko oyo Yona akutanaki na yango ekokani na minyoko oyo bakristo ya malembe-malembe (bilenge basi ya bozoba — *Matayo 25*) bakoleka, baoyo bakotikala na konetolama te. Lisusu tomonaki ndenge Yona amelamaki na mbisi monene oyo eutaki na mbu mpe afandaki mikolo misato na libumu na yango; ndenge moko mpe, bato wana bakolamama na nyama oyo euti na mbu, oyo ezali na mitó nsambo mpe maseke zomi (elakisi Motemeli-Klisto mpe bokonzi na ye) na boumeli ya mbula misato na ndambo na kati ya mpasi monene (*tángá Emoniseli 13 mpe 17*).

Yango wana lisolo ya Yona ezali solo esakweli ya makambo oyo ekosalema na mikolo ya suka.

Tótanga Yona mokapo ya 3

Yona 3:1-10 (Mokanda na Bomoi)



1 Liloba ya Yawe eyelaki Yona mpo na mbala ya mibale, elobaki :

2 “Tελεμα, kende na Ninive, engumba monene wana, mpe sakolá nsango oyo nakopesa yo.”

3 Yona atελεmaki mpe akendeki na Ninive ndenge Yawe alobaki. Ninive ezalaki engumba monene mingi, mobembo na yango ezalaki ya mikolo misato.

4 Yona abandaki kokota na engumba, mpe nsima ya mobembo ya mokolo moko agangaki : “Nsimba ya mikolo ntuku minei, Ninive ekobebisama!”

5 Bato ya Ninive bandimaki Nzambe, bakataki kokila bilei mpe balatakí bilamba ya mawa, kobanda na monene kino na moke.

6 Sango ekómaki epai ya mokonzi ya Ninive; alongwaki na kiti na ye ya bokonzi, alongolaki elamba na ye, alataki saki mpe afandaki na putulu.

7 Apesaki mobeko na engumba mobimba ete : moto to nyama, bangombe to bampate, bália te mpe bámela te.

8 Kasi bato nyonso mpe banyama balata saki, mpe baganga makasi epai ya Nzambe; moto na moto atika nzela na ye mabe mpe makambo ya mabe oyo azalaki kosala.

9 Nani ayebi? Mbala mosusu Nzambe akobongola motema mpe akotikela biso nkanda na Ye mpo tóbebisama te.

10 Nzambe amonaki misala na bango, ndenge batikaki banzela na bango ya mabe; bongo Nzambe abongolaki ekateli na Ye mpe asalaki bango mabe te ndenge alobaki.

Liteya

Sima Yona kobwakama uta na libumu ya mbisi, Nkolo atindaki ye lisusu mpo na mbala ya mibale na Ninive kosakola tobá. Asakolaki ete soki batubi te, engumba ekobebisama nsima ya mikolo 40. Kasi bato ya Ninive bayokaki mongongo ya Nzambe mpe batubaki.

Nini esalaki ete batuba noki boye?

Na tango wana, Ninive ezalaki lokola Sodoma mpe Gomora — bingumba ya mokili mobimba, bato bayebaki mibeko ya Nzambe te, bazalaki kosambela banzambe mingi mpe batondaki na masumu. Ezalaki mpasi ete moto moko oyo ayebani te aya koloba ete Nzambe akoboma engumba na bango.

Yango wana Nzambe atikaki Yona afanda mikolo misato na libumu ya mbisi lokola elembo mpo bato bandima. Mbala mosusu Yona ayebisaki bango litatoli na ye, mpe bato oyo bazalaki na masuwa bamemaki litatoli yango. Ntango bayokaki yango, bato ya Ninive babangaki Nzambe mpe batubaki solo.

Ndenge moko na mikolo ya suka

Tango ekomaki pene mpo Nzambe asambisa mokili mpo na masumu, Nzambe — lokola azali na mawa — abandaki kotinda basakoli kosakola TOBA.

Tomonaki Yoane Mobatizi kobenga bato na tobá mpo kosambisama ezalaki pene. Na suka, Nzambe atindaki Mosakoli oyo azalaki lokola Yona — Nkolo Yesu Klisto — na elembo monene.

Elembo ya Yona — Yesu Klisto

Matayo 12:38-41 (Mokanda na Bomoi)

38 Bamosusu kati na balakisi ya mibeko mpe Bafarizai balobaki : “Moteyi, tolingi omonisa biso elembo.”

39 Yesu azongisaki : “Libota mabe mpe ya pite ezali koluka elembo; kasi elembo moko kaka ekopesama — elembo ya mosakoli Yona.

40 Ndenge Yona azalaki mikolo misato mpe butu misato na libumu ya mbisi, ndenge moko Mwana na Moto akozala mikolo misato mpe butu misato na motema ya mabele.

41 Bato ya Ninive bakotelema na mokolo ya kosambisama mpe bakosambisa bato ya libota oyo, mpo batubaki na nsango ya Yona; kasi awa azali Moto aleki Yona.”

Yesu nde Yona na biso. Liwa na Ye mpe lisekwa na Ye ezalaki elembo monene mpo bato nyonso batuba. Soki Yesu amataka kaka na likoló kozanga liwa mpe lisekwa, bato balingaki kondima te.

Kasi Yesu alobaki ete bato ya Ninive bakosambisa libota oyo mpo bango batubaki na elembo moko kaka, nzokande biso tomoni makamwisi mingi mpe kobikisama mingi, kasi bato mingi batubi te.

Matayo 11:20-24 (Mokanda na Bomoi)

Yesu abandaki kopamela bingumba oyo asalaki makamwisi mingi, mpo batubaki te...

Alobaki ete Sodoma elingaki kotikala kino lelo soki emonaki makamwisi oyo bamoni.

Ntango ya ngolu ezali na suka

Bato ya Ninive bapesamaki mikolo 40 mpo batuba. Nsima na yango, lobiko elingaki kosila.

Ndenge moko mpe biso tozali na ntango oyo Nzambe apesi biso.

Luka 13:23-28 (Mokanda na Bomoi)

23 Moto moko atunaki : “Nkolo, bato oyo babikisami bazali moke?”

24 Yesu alobaki : “Bosala makasi bokota na ekuke ya moke...”

25 Tango nkolo ndako akotelema mpe akokanga ekuke, bokobeta libándá koloba : “Nkolo, fungolá biso!” Kasi akoloba : “Nayebi bino te.”

28 Kuna nde kolela mpe kosakana mino ekozala, tango bokomona Abrahama, Izaka, Yakobo mpe basakoli na Bokonzi ya Nzambe, kasi bino bobwakami libándá.

Libenga ya suka

Bandeko, mokili ezali pene kokokisa ntango na yango. Bilembo nyonso ezali kolakisa ete tozali na mikolo ya suka. Mokolo moko nsango ya tobá ekoyokama lisusu te, mpe bato ya Ninive bakosambisa baoyo baboyaki kotuba atako bamonaki bilembo mingi.

TUBA Ielo!

Tobá elingi koloba kobongola motema mpe kotika nzela mabe, kaka kobondela maloba te. Nzambe atalaki MISALA ya bato ya Ninive, kaka kolela na bango te. Ntango amonaki ete babongolaki bomoi na bango, abongolaki ekateli na Ye.

Sala mpe yo ndenge moko. Klisto naino ayí te, kasi azali koya noki mpo na kozwa baoyo bazali pene.

Nzambe apambola yo.

Share on:
WhatsApp